



Sesida dals

Communitgà il

Protocol nr.

28 da favrer 2023

1. da mars 2023

154/2023

Dumonda Righetti

concernent occurrenzas betg approvadas

Resposta da la Regenza

Il mantegniment da l'urden public e da la segirezza publica è tenor l'art. 79 da la Constituziun dal chantun Grischun (CC; DG 110.100) da princip ina incumbensa cuminaivla dal chantun e da las vischnancas. Las vischnancas adempleschan las incumbensas che las èn vegnidas surdadas sco er tut las fatschentas localas ch'il dretg chantunal na regla betg u betg definitivamain (art. 48 da la Lescha da vischnancas dal chantun Grischun [LV; DG 175.050]). Perquai fixescha l'art. 3 da la Lescha da polizia dal chantun Grischun (LPol; DG 613.000) che las vischnancas adempleschan sin lur territori quellas incumbensas da polizia, per las qualas il chantun n'è betg responsabel. Quai cumpiglia en spezial il mantegniment da quietezza, urden e segirezza. Plinavant èn las vischnancas responsablas per autorisar l'utilisaziun dal terren public (art. 3a LPol). Avant che conceder la permissiun, ston ellas consultar la Polizia chantunala, sch'i vegn fatg quint ch'i dovria in'acziun da polizia. Per occurrenzas, per las qualas ina permissiun per l'utilisaziun dal terren public vegn dumandada, stoi da princip vegnir resguardà, che l'organisatur e la persuna da contact sajan enconuschents ed i sto vegnir inoltrà in concept da segirezza e sanidad e/u da traffic che dependa da la grondezza da l'occurrenza. Ultra da quai ston vegnir consideradas – en dependenza dal lieu da l'occurrenza – eventualas restricziuns tras ulteriuras leschas (p.ex. Lescha chantunala davart il gaud, Lescha davart las vias, Lescha da vischnancas). Er in'assicuranza da responsabladad per l'occurrenza sto esser avant maun.

Tar la dumonda 1: Qua avant maun sa tractavi d'ina occurrenza (betg permessa) ch'è vegnida realisada sin il territori da la vischnanca da Roveredo. En tals cas è da princip la vischnanca pertutgada responsabla per observar la quietezza, l'urden e la segirezza. En quest connex po ella clamar il sustegn da la Polizia chantunala (cf. art. 5 al. 2 LPol).

Tar la dumonda 2: Sch'ina occurrenza vegn manada tras senza permissiun, q.v.d. en moda illegala, e sche la Polizia chantunala survegn enconuschientscha da quella,

surveglia ella l'occurrènz tenor ses catalog d'incumbensas ed infurmescha la vischnanca pertutgada. In'ulteriura intervenziun vegn mo fatga sin dumonda da la vischnanca u tar eveniments penals u en cas d'ina situaziun da periclitaziun. Ultra da quai pretenda in princip constituziunal ch'in agir dal stadi stoppia esser commensurà (art. 5 al. 2 CC). En il cas qua avant maun è l'occurrènz betg permessa vegnida survegliada pliras giadas da la Polizia chantunala ed i èn vegnidas fatgas pliras controllas da traffic. En quest connex èn vegnids constatads e chastiads delicts cunter la legislaziun davart il traffic sin via. Perquai che l'occurrènz è stada paschaivla e perquai che la vischnanca n'aveva er betg fatg ina dumonda per agid uffizial, n'ha la Polizia chantunala gè nagin motiv d'intervègnir ulteriuramain. Tant pli ch'i n'ha betg dà annunzias da la populaziun davart disturbis. La Polizia chantunala ha immediatamain prendì tut las mesiras da retschertga e d'inquisiziun necessarias, suenter ch'ella ha survegnì l'annunzia da l'ospital da Bellinzona, ch'ina dunna giuvna senza conscienza saja vegnida ospitalisada. Sin questa basa vegn ussa manada ina procedura penala.

Tar la dumonda 3: Igl è chausa da las vischnancas da procurar en connex cun occurrènz ch'in concept per il servetsch da sanidad correspondent vegnia elavurà e realisà (art. 6 da la Lescha davart la protecziun da la sanadad en il chantun Grischun [DG 500.00]), uschenavant che questa incumbensa n'è betg vegnida surdada al chantun, èn numnadamain las vischnancas responsablas per la protecziun da la sanadad da la populaziun. Las basas giuridicas existentas bastan per prender las mesiras necessarias en connex cun occurrènz betg permessas. Cuntravenziuns, sco en il cas qua avant maun, vegnan persequitadas penalmain. Tar occurrènz che vegnan identifitgadas sco betg permessas èsi er pli cunvegnent, sche la vischnanca – eventualmain cun agid da la Polizia chantunala – ordinescha consequentamain da terminar l'occurrènz, premiss che quai vegnia giuditgà sco commensurà. Ultra da quai èsi da partir dal fatg, ch'er sch'il legislatur chastiass las persunas che na dumondan betg ina permissiun, che quai n'avess betg in effect decuraschant supplementar. Pli raschunaivel che scumonds supplementars èn mesiras da scleriment e da sensibilisaziun sco er lieus, nua ch'ils giuvenils pon sa scuntrar legalmain e senza disturbis, e nua ch'i vegn purschida ina cussegliaziun nunbirocratica che rinforza ils giuvenils en lur atgna responsabladad.



En num da la Regenza

Il president:

Peter Peyer

Il cancellier:

Daniel Spadin